



## **KENYATAAN MEDIA**

---

### **MALAYSIA SENTIASA MENDUKUNG PRINSIP KEBEBASAN MEDIA**

Kementerian Komunikasi dan Multimedia Malaysia (KKMM) mengambil maklum tentang Indeks Kebebasan Media 2021 yang dikeluarkan oleh Reporters Without Borders (Reporters Sans Frontières, RSF) pada 17 April 2021, di mana Malaysia mencatat kedudukan ke-119.

Kerajaan Malaysia sentiasa komited dalam menyokong dan menegakkan kebebasan media di negara ini. Pendirian Kerajaan ini juga telah dinyatakan dengan jelas dan mengiktiraf peranan penting para pengamal media dalam menjalankan fungsi dan menunaikan tanggungjawab mereka.

Ketika kita sedang berjuang menghentikan pandemik COVID-19, Kerajaan di serata dunia juga berhadapan dengan cabaran menangani penyebaran maklumat palsu dan memastikan berita serta informasi yang sah dan tepat disalurkan kepada rakyat. Perkara ini amat penting terutamanya bagi usaha menyelamatkan nyawa dan menjaga keselamatan sejagat dalam krisis kesihatan yang melanda ini. Justeru, penguatkuasaan Ordinan Darurat (Kuasa-Kuasa Perlu) (No.2) 2021 mulai 12 Mac 2021 adalah khusus bagi menangani maklumat tidak benar berkaitan COVID-19 dan Proklamasi Darurat.

Usaha mencegah penyebaran maklumat palsu bukan bermakna menyekat kebebasan media. Malahan media di negara ini telah sekian lama menjalin usaha sama dengan Kerajaan dan sentiasa proaktif membantu menyangkal maklumat palsu. Dalam era teknologi maklumat abad ke-21 ini, media bukan sahaja berperanan menyebarkan maklumat yang telus, tetapi juga melindungi masyarakat daripada penularan maklumat palsu yang boleh menggugat kestabilan dan keharmonian negara.

Kerajaan juga sentiasa bersikap terbuka untuk menerima apa jua pandangan serta maklum balas demi kebaikan yang mengutamakan rakyat. Di kesempatan ini saya memberi jaminan Kerajaan akan terus menyediakan ruang yang seluas-luasnya kepada pihak media untuk melaporkan berita selari dengan peruntukan yang sedia ada di bawah Perlembagaan Persekutuan.

**DATO' SAIFUDDIN ABDULLAH**  
**MENTERI KOMUNIKASI DAN MULTIMEDIA**

**22 APRIL 2021**